

Pabien Mascaruba cu bo 46 año

STA. CRUZ -- Awe, dia 10 di April 2007, Organizacion di Teatro Mascaruba ta cera su 45 año di aniversario. Tabata un año cu hopi actividad pa publico en general y pa miembronan y na famia. Tambe e tabata un año di sorpresanan agradabel. Obranan na television. Den cooperacion cu UNOCA y Telaaruba televidentenan por a goza di varios obranan di Mascaruba entre otro: Ken ta Keda cu Mama y Un Trabao Milagroso. Mascaruba ta studiando e posibilidad pa haci e DVDnan aki accesibel pa publico y schoolnan. Fuera di por goza di e obranan riba e DVDnan aki, nan por ta hopi valioso den lesnan di por ehempel Papiamento, literatura, exprecion dramático...etc. Presentacion di e obra Señora Zapate. Despues di un periodo bastante largo Mascaruba a presenta den Cas di Cultura den cooperacion cu UNOCA e obra Señora Zapate. E obra aki tabata un obra alegre cu baile y canto y un elenco di 22 actor. Den e obra aki Mascaruba a combina e seccion di adulto y di e hobennan Masca-10-er.

Exposicion den Cas di Cultura. Durante e presentacionnan den Cas di Cultura tambe tabatin un exposicion di e historia di Mascaruba. Den e sala di exposicion por a waak y siña di tur e obrana cu Mascaruba a yega di presenta na Aruba den Antiyas y den exterior. E proyecto aki tabata den cooperacion cu UNOCA y artistanan local. Presentacion na Cuba. Den luna di Augustus un delegacion di diesun persona di Mascaruba y FUNDARTE a biaha pa Cuba. Na Cuba, Mascaruba a presenta e obra Ta'wo tin Cuator den e festival di teatro di CARA (Caribbean Regional Alliance). Mascaruba ta miembro di CARA y di IATA/AITA pa hopi año caba (International Amateur Theater Association). Premio Cadushi di Cristal. Den Luna di September Organizacion di Teatro Mascaruba tabatin e sorpresa y gran honor di por a ricibi e prestigioso premio Cadushi di Cristal. Mascaruba a ricibi e premio aki pa su contribucionan den promove y duna valor na nos idioma Papiamento. E premio aki ta

ser otorga cada dos año. Subsidio di UNESCO. Na luna di November Mascaruba a ricibi otro grato sorpresa den e noticia di UNESCO cu nos a ricibi un subsidio pa un proyecto cu nos a entrega un peticion p'e. E proyecto ta encera promocion di teatro den tur sentido primordialmente bao di hubentud pa medio di tayernan di contenido teatral y ekipo tecnico. E proyecto aki ta andando caba. Bishita di Su Mahestad Reina Beatrix. Na November tambe Mascaruba a coopera cu su participacion cu e comite organizador den e proyecto pa bishita di Su Mahestad Reina Beatrix. Mascaruba a presenta un "tableau vivant" den cayanan di Oranjestad. Actividadnan pa miembro y na famia. Miembronan por a goza di un celebracion bunita dia 10 di April 2006 cu sketchnan, poesia, historia den Cueba di Mascaruba. Pa fin di año tabata tin un cena pa miembronan y nan famia den Teatro Geechi Pieters cu primicia di un pagara. Y na Februari tabata tin un anochi di Seso Sport sumamente exitoso.

Directiva nobo. Den su reunion general di miembronan na fin di Februari, un directiva nobo a keda eligi: Presidente: Angelo(Tata) Tromp, Tesorero: Bill Tromp, Secretario: Luty Martinez. Comisarionan: Filomena Schwengle (vice presidente), Luz Bislik (Segundo secretario), Benny Heinze (Segundo tesorero) y Ted Hasham (experto tecnico). Obra Alegre na Caminda: Nos ta invita henter publico amante di teatro pa keda pendiente pa un obra grandi y super alegre den luna di Augustus venidero. Boso lo

hari barica yen. Un Danki Grandi di Curazon ta bay na UN y TUR, organizacion-, instancia-, comercio y individualnan cu di un manera of otro a y ta kere den Mascaruba, sea como sponsor y/o otro forma a contribui na proyectonan di nos organizacion. Y sin mas danki, danki, danki na nos publico fiel amante di teatro cu a sa di comparti cu nos obranan pa e ultimo 45 año. Miembronan, grandi, chikito y famianan: Pabien un y tur cu nos 46 año. Y sigui nos ta sigui. TOI TOI

